



Le sang d'Abel crie à Dieu vengeance contre Cain, lequel se desespera, & est maudit, & est vagabond sur la terre.

LE Seigneur ayant veu le meurtre de Cain fait à son frere Abel, dit à Cain, Où est ton frere Abel ? il répondit, Je ne sçay. Suis-je le gardien de mon frere ? Et Dieu dist derechef, Qu'as-tu fait ? la voix de ton frere crie de la terre vers moy. Maintenant donc tu seras maudit sur la terre, laquelle a ouuert sa bouche pour receuoir de ta main le sang de ton frere. Quand tu laboureras la terre, elle ne te rendra plus de ses fruits : tu seras vagabond & fugitif sur la terre. Lors Cain dit au Seigneur, Mon iniquité est plus grande que i'en puisse auoir pardon, ie m'en vay & me cacheray de deuant ta face, & qui me trouuera me tuëra. Et le Seigneur luy dist, Certes quiconque occira Cain, fera sept fois plus puny. Or le Seigneur mit vn signe en Cain, afin qu'il ne fust occis : Lequel se retira de la presence du Seigneur, & habita en la terre vers l'Orient d'Eden. Apres Cain connût sa femme, laquelle conceut & enfanta Enoch, & edifia vne cité qu'il nomma du nom d'Enoch, puis Enoch engendra Irad, & Irad engendra Mauiaël, & Mauiaël engendra Mathusael, & Mathusael engendra Lamech, & Lamech prit pour soy deux femmes, le nom de l'une estoit Ada, & le nom de l'autre estoit Sella.

Genese 4. Chap.